

Inatsisartut suleriaasianni § 36, imm. 2 naapertorlugu Atassut Naalakkersuisunut ima apeqquteqarpoq:

**Naalakkersuisunut apeqqut: Ilinniagaqartut qitornallit ilinniarnerminni atugarisaat pitsanngorsaaviginiarlugit Naalakkersuisut sulinerat sumut killippa?**

(ATASSUT-ip Inatsisartuni ilaasortaaitai: Finn Karlsen, Siverth K. Heilmann, Knud Kristiansen)

**Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Inatsisartut 2008-mi upernaakkut ataatsimiinneranni Atassut ilinniagaqartut qitornallit ilinniarnerminni atugarisaat pitsanngorsaaviginiarlugit nutaanik najoqqutassiornissamut Naalakkersuisut sulissute-qarnissamut peqquneqarnissaannik inatsisartut aaljangiiffigisassaattut siunnersuuteqarpoq. Aappassaaneerinninnermi Siumut Atassullu siunnersuummut tapersersuippat Naalakkersuisullu ilinniagaqartut qitornallit atugarisaannik pitsanngorsaannissamut sulissuteqaqquneqarlutik.

Ilinniagaqartut qitornallit ullumikkut pisinnaatitaaffeqarput Ilinniagaqarnersiutit pillugit Namminersornerullutik Oqartussat nalunaarutaat nr. 8, 27. marts 2008-meersoq naapertorlugu malittari-sassaartinneqartunik. Taakku tassaapput

- Meeqqanut tapit, ilinniagaqartoq meeqqanut 18-it inorlugit ukiulinnut pilersuisussaappat imaluunniit akilersuisussaataappat, meeqqap Kalaallit Nunaanni najugaqarnerani Kalaallit Nunaanni akilersuutip nalinginnaasup assinganik (1.000.- kr.), meeqqallu Danmarkimi najugaqarnerani Danmarkimi akilersuutip nalinginnaasup assinganik (1.128,- kr.). Meeraq Kalaallit Nunaanni imaluunniit Danmarkimi najugaqanngippat nunatsinni akilersuutip nalinginnaasup assinganik tapiissuteqartoqassaaq. Meeraq Kalaallit Nunaanniinnanilu Danmarkimiinngippat tapit Kalaallit Nunaanni akilersuummut nalinginnaasumut naapertuutissapput.
- Ilinniartup meeraq najugaqatigippagu atuangikkallarfeqaranilu anaanaasumut tapitut qiugassat aqqaneq marluk ataataasumullu arfinillit.
- Ilinniarnernup aallartinnerani, unitsinneqarnerani, unitsikkallarfeqarnerani naammassineqarneraniluunniit meeqqanut 18-it inorlugit ukiulinnut akiliussilluni angalatitsineq. Tamanna ilinniagaqartup nammineq meeraanut ilinniagaqartulluunniit aapparisaata meeraanut atuuppoq.
- Atuarnermut Kalaallit Nunaanni pisumut.
- Meeqqanik akiliussilluni angalatitsisoqartillugu aapparisaat akiliussilluni angalatitsineq.
- Meeqqat Kalaallit Nunaanni najugarivitaannut akiliussilluni juullisiorititsineq.
- Aapparisaat meeqqanullu akiliussilluni juullisiorititsineq.
- Ilinniagaqartunut qitornalinnut qaammatit arfinillit sinnerlugit atuartussaasunut praktikertussaasunulluunniit pisattat angallanneqarnerannut akiliussineq.
- Ilinniagaqartunut pingasunik amerlanerusunilluunniit qitornalinnut containerit marluk nassiussalluunniit 12 m<sup>3</sup>-isut initutigisut.

- Meeqqat perulunneranni toquneriniluunniit akiliussilluni angalatitsinerit.

Naalakkersuisut isumaqarput ilinniagaqartut, taakkununga ilanngullugit ilinniagaqartut qitornallit ataatsimut isigalugu atugarissaartinneqartut, taamaattorli ilinniagaqartut atugarisaasa pitsanngorsarneqarnissaannut Naalakkersuisut ataavartumik sulissuteqarniarput.

Ilinniagaqarnersiutit pillugit Inatsisartut pequssutaanni nr. 5-imi, 14. november 2004-meersumi § 4, imm. 3 naapertorlugu Naalakkersuisut ilinniagaqartut kattuffiitut tamanna pillugu oqaaseqaammik sioqutsisumik pissarsiniaqqaarlutik ilinniagaqarnersiutit suussusissaat amerlassusissaallu pillugit malittarisassat aalajangersassavaat. Ilinniagaqarnersiutit pillugit nalunaarutip iluarsaanneqarnera Naalakkersuisut aallartippaat tamatumunngalu atatillugu ilinniagaqartut qitornallit atugaasa pitsanngorsarneqarnissaannut periarfissat misissussallugit. Sulinermut tamatumunnga atatillugu sullissimeqarfiit attuumassutillit ataatsimeeqatigineqarsimapput, kiisalu ilinniagaqartut kattuffii oqaloqatigineqarput kattuffiillu suleqqinnissami ilaatinneqassapput.

Nalunaarutip iluarsaanneqarnera Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisuusimasumit ilinniagaqartut qitornallit atugaasa eqqartorneqarfigisaannik kaammaattuuteqarfiviumngitsumilli ilinniagaqarnersiutit pillugit 15. april 2009-mi isumasioqatigiisitsisumit aallartinneqarpoq.

Isumasioqatigiinnermi 2004-mi Ilinniagaqarnersiutinik aqqissuusseqqinnermi siunertaasut piviusunngortinneqarsimanerisa naliliiffigineqarnissaat siunertaanerpaavoq, aammali allaffissorfiunnginnerusumik aalajangersagaqarnissaa ujartorneqarluni. Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmeersut, Inuussutissarsiornermut Suliffeqarnermullu Naalakkersuisoqarfimmeersut, Ilinniagaqarnersiuteqartitsivimmeersut, kiisalu ilinniagaqartut kattuffiineersut, KIK, Avalak aamma Kisaq peqataapput.

Isumasioqatigiinnermit eqqartuinerit nalunaarummik iluarsaannermi taaneqartumi ilaatinneqarput. Ilinniagaqarnersiutit pillugit nalunaarut nutaaq ukiup atuarfiusup tulliaata aallartinnerani, tassa 1. august 2010-mi atuutilissangatinneqarpoq.